

TORITENY - ALAHADY faha-5 PAKA - TAONA D



***Mifankatiava, ary aoka ho toy ny nitiavako
anareo no hifankatiavanareo.***

Ry kristianina havana, tsy nitsahatra isika namerimberina nanomboka tamin'ny Paka fa isaky ny Alahady dia misy endrik'i Kristy ilay famindrampon'Andriamanitra no asongadin'ireo vakiteny. Tamin'ny Alahady lasa teo isika dia nibanjina ary niezaka hahalala bebe kokoa fa i Kristy no endriky ny famindrampon'Andriamanitra mpiandry ondry tsara. Amin'izao Alahady fahadimy amin'ny Paka izao dia endrika anankiray no banjinintsika dia i Kristy loharano niavian'ny anarana hoe Kristianina. Izay anarana niaviansika izay no "identité"ntsika ka banjinintsika izany hoe ;

- inona ny maha-Kristianina mpanaradia an'i Kristy atsika ?
- aiza ny fototra sy loharano maha-Kristianina atsika ?
- iza marina i Kristy arahintsika io ?

Tsy maintsy mba hafa noho ny rehetra isika ry Kristianina havana. Raha mitovy amin'ny

Vakiteny I : Asa 14, 20b-26

Salamo : Sal. 144

Vakiteny II : Apôk. 21, 1-5a

Evanjely : Jo. 13, 31-33a

rehetra isika dia tsy hitako inona no hanomezana anarana atsika hoe Kristianina. Marina fa eo anivon'izao tontolo izao isika fa tsy eo anisan'izao tontolo izao. Tsy mitsahatra aho mamerina an'izay fa eo anivon'izao tontolo izao isika, mivelona hoatry ny mpiara-monina rehetra fa manana

an'izay hoe Kristianina izay no maha samihafa.

Raha atao amin'ny teny fohy amin'izao andro izao dia hoe " plus " izany ny "identité" ntsika noho ny batemy noraisintsika ka na manao akory na manao akory dia tokony hohanjintsika bebe kokoa amin'izao taona masina izao satria tsy taona masina mikombona no antsoin'i Papa amin'izao taona masina famindram-po izao fa taona masina misokatra. Mba isika no hanome aim-baovao an'ity tranobentsika marary ity fa indrindra ity tanànantsika ity. Io no antony ilantsika ny "la chapelle" ny famindram-po izay aorintsika mba ho hisy Fo amin'ity tanànantsika ity. Izany hoe misy Fo, Kristianina mpamindra Fo ka ho Fo Kristianina no mitepo amin'ity tanànantsika ity ary izay no irintsika tokoa ry Kristianina havana. Ho lalivay, ho sira hanome sirony ny tanànantsika isika Kristianina. Matoa isika mitondra ny anarana Kristianina dia manana ny hiavahany amin'ny hafa.

Ny tenin'Andriamanitra androany dia mampisongadina ny endrik'i Kristy, ka ilay endrik'i Kristy no tsy maintsy endrikin'ny Kristianina. Ny Alahady lasa teo dia nankalaza isika ny mpiandry ondry tsara ka isika koa izany tsy maintsy manana an'izay toetra izay, tsy maintsy mahafoy ny aina ary ny ondrintsika tsy maintsy mihaino mandray ny tenintsika. Mba ho tanteraka tokoa izay dia inona ary ny atolotrin'ny Eglizy amintsika amin'izao Alahady fahadimy izao mba hivelomantsika an'izay antson'Andriamanitra amintsika izay : ny antony anirahana antsika, ny antony mampisy antsika eo anivon'izao tontolo izao? Hahatonga atsika hahay hampitraotra ny finoana sy ny fiainana andavanandro. Matetika isika manontany inona marina ny tena dikan'izay ?

Androany Alahady fahadimy fankalazana ny Paka dia misy ny fototra sy loharanon'izay no ampianarin' Eglizy atsika. Henointsika ny hafatr'i Kristy mametraka amintsika an'izay iraka izay. Hoy izy ao amin'ny Evanjely mampianatra atsika : *"Ny hafantaran'olona fa mpianatro ianareo dia ianareo mifankatia, mifanasoa, mifanasa tongotra"* hoy indrindra izy manamafy an'izany fampianarana izany *" Didy vaovao no homeko anareo dia ny mba hifankatiavanareo"*.

Tsy vaovao io fa ny maha-vaovao azy dia ny teniny hoe " **Tahaka ny nitiavako anareo**". Izany dia midika fahafoizan-tena, manaiky ho mpanompo ary izay koa no ambaran'ny boky fanambarana nosoratan'i Md Joany ao amin'ny vakiteny faharoa (Apôk. 21, 1-5a) raha niresaka momba ny fiainan-koavy izy dia i Jerosaema hoavy *"Hofafan'Andriamanitra ny ranomaso rehetra tamin'ny mason'izy ireo ary ny fahafatesana dia tsy ho hisy intsony satria ao anaty fifankatiavana mitondra ny tena fiadanana"* ary dia izay ny lanitra vao sy tany vao eo amintsika izany hoe : arakaraky ny hivelomantsika an'izay "identité" ntsika izay eo anivon'izao tontolo izao no hanova an'ity tontolo manodidina atsika ity, ny tranobe iombonantsika ity ka na dia eo aza ny zava-manahirana na mety manapotika ny fiainantsika aza dia fantantsika izay niseho tany Ikôniôma, tany amin'ny tany rehetra nandalovan'i Paoly sy Barnabe fa ampaharetana fahoriana no nampidiran'izy ireo ny tenin'Andriamanitra.

Tsy tany malemy anorenam-pangady ny finoana fa tany lonaka hiasan'ny fahasoavan'Andriamanitra mba hitaran'ny fanjakan'Andriamanitra ary dia izay tokoa no niseho tamin'ny fotoanandron'i Paoly sy Barnabe. Na dia nisy sedra maro aza dia niroborobo ny fitoriana ny vaovao mahafaly satria nivelona an'izay maha Kristianina, maha mpianatr'i Kristy azy izay izy ireo.

Io koa no toe-tsaina sy toe-po andrindrantsika ry Kristianina havana amin'izao isika mankalaza ny taona masina izao ho taonan'ny famindram-po ka hanome Fo amin'izay rehetra manodidina antsika manomboka ao amin'ny fianakaviana, Fo kristianina ny fianakaviansika, ny fiaraha-monintsika, ny tanànantsika ary dia asehontsika amin'izay ataontsika izay ao anatin'ny fifankatiavana, fifandeferana.

"Tahaka ny nitiavako anareo" hoy i Jesoa ao amin'ny Evanjely (Jo. 13, 31-33a), izay no azo lazaina fa maha samihafa ny fitiavana ambaran'ny fahendren'izao tontolo izao ny fifankatiavana ampianarin'i Kristy atsika ary izay ny maha vaovao ny didy omen'i Kristy atsika. Hoy izy hoe ; ***"Didy vaovao no homeko anareo, mifankatiava ary aoka toy ny nitiavako anareo no hifankatiavavareo, izany no hahafantaran'ny olona rehetra fa mpianatro ianareo raha mifankatia"***

Ry Jesoa Tompo ô mazava izay teninao izay tahaka ny nitiavanao anay, tsy inona izay fa manana ny toetra maha Andriamanitra anao ianao fa nataonao tsinontsinona izay fa nidina farany ambany ianao satria nanaiky ho mpanompo ianao mba hanavotra anay ary dia nanasa ny tongotray sy nanadio ny fiainanay ka nanala anay amin'ny ratsy. Ampianaro ary izahay fa indrindra amin'izao taonan'ny famindram-po izao mba hahatsapa fa amin'ny alalan'ny fanompoana irery ihany no anehoanay ny tena maha zanak'Andriamanitra anay. Izany fanompoana izany tsy hoe andevo akory fa araky ny nampianarinao anay dia zanan'Andriamanitra izahay ka mitady ny soa ho an'ny hafa. Tsy ao anatin'ny avonavona na ny fialonana, tsy mitsara fa mikatsaka hatrany izay mahaso, tsy mitsara fa manatsara an'izay rehetra manodidina anay ka mba ho Fo vaovao tokoa anie ny fonay fa indrindra amin'izao taonan'ny famindram-po izao ka hahay hamindra Fo amin'ny manodidina anay. Amen